

Cubaan seludup barangan kawalan ke Indonesia gagal

2020-06-23T12:05:53+08:00

oleh Jeremy Lanson



Barang kes diserahkan kepada KPDNHEP untuk tindakan selanjutnya.

KUCHING: Cubaan menyeludup keluar 44 tong gas petroleum cecair (LPG) serta 24 kilogram gula berjaya dipatahkan oleh Pasukan Gerakan Am (PGA) berhampiran sempadan Sarawak-Kalimantan di Serian pada Ahad.

Jurucakap Kementerian Perdagangan Dalam Negeri dan Hal Ehwal Pengguna (KPDNHEP) Sarawak berkata pasukan operasi menjalankan rondaan dan mengesan dua buah kenderaan jenis lori dan pacuan empat roda dalam keadaan mencurigakan.

Menurutnya, hasil pemeriksaan menemui barang-barang kawalan bersubsidi yang disyaki cuba diseludup ke negara jiran.

"Terdapat tangkapan (suspek) dan hasil siasatan KPDNHEP mendapati dia tidak memiliki lesen atau kebenaran untuk memiliki atau menjalankan urus niaga barang kawalan tersebut.

"Kesemua barang rampasan tong gas, gula dan dua buah kenderaan tersebut dianggarkan berjumlah RM86,050 diserahkan kepada KPDNHEP untuk siasatan lanjut," katanya dalam satu kenyataan, hari ini.

Tambahnya, siasatan dijalankan di bawah Seksyen 21 Akta Kawalan Bekalan 1961 dibaca bersama Peraturan 3(1) Peraturan- Peraturan Kawalan Bekalan 1974 yang membawa hukuman penjara dan denda sehingga RM3 Juta jika disabitkan kesalahan.

"KPDNHEP dengan kerjasama jabatan dan agensi penguatkuasa lain akan sentiasa memantau dan menjalankan pemeriksaan untuk menangani ketirisan barang kawalan bersubsidi," tegasnya.

<https://www.utusanborneo.com.my/2020/06/23/cubaan-seludup-barangan-kawalan-ke-indonesia-gagal>

